

86. Historisches Stoss – Schiessen

Am Sundig 30. Ouguscht hei sech d Jungschütze u ihri Begleiter am Morge früh (viertu vor 6i!) bim Schützehuus ir Längmatt troffe. Nachdäm aui Gwehr usgstosse und d Verschlüss montiert si gsi, hei mer nis ufe Wäg richtig Appizäu gmacht. Die meischte si no chli müed gsi u hei d Ouge ab und zue doch no chli zue gmacht während em fahre, ussert natürlech die zwe Fahrer nid! Nach Züri hei mer ä churzi Pouse gmacht, dass mer doch aui afange öpis chlises Zmorge hei chönne näh. Nach dere sterckig hei mer no dr räschte vom Wäg unger d Redli gno. Zimli gnau zur abgmachte Zyt, +/- 9i si mer am Stoss acho. Dert het nis dr Presidänt vom Stossschützeverband dr Peter K. Rüeegg härzlech empfangen.

Mir hei bim Büro üsi Munition greicht u hei dänkt, mir gönge mau go luege, wie dr Schiessplatz druf obe usgseht. Da mer scho Rangeure übercho hei, si mer obsi gschuenet. Dobe acho, hei mer aui mau chli nach Luft gschnappet. Isch nid ä länge aber steile ufstig gsi. Jä nu. Es isch henne speziell gsi dert. Für üs aui! Si mer doch dert im Gras usse gläge, de hinge ufgsteuti Schibene u ä hufe Heinzumandli wo bim ertöne vom Horn wie ds bisiwätter richtig Schibene gsecklet si u mit de verschidnige Cheueli d Püunkt azeitgt hei. Für üs aui, meh oder weniger Nöiland, aber mir heis schnäu begriffe u hei nis a die nöii Situation gleitig gwanet gha.

So het jedes nadisna siner 12 Schüss gschosse gha. Während em Schiesse isch o dr Feschtreder Herr Bundesrat Ueli Maurer do uftoucht. Mir hei ne afange vo witem gseh u o chli ghoffet, mi chönti de vilech probiere äs Gruppeföteli mit ihm ds mache.

Nachdäm aui gschosse hei gha, simer richtig Feschtzäut. Die einte si mit de Gwehr zu de Outos ga ilade, u die anger hei probiert ä Platz ds ergattere. Naja, das isch nid so eifach gsi. Das Zäut isch so ds säge us aune Nähtlige platzt.

Aber mir wüsenis ds häufe. Und hopp, hei mer ä Tisch mit Bänk uftribe, u hei eifach userhaub vom Zäut aghänkt, das het perfekt passt und funktioniert. Nach däm feine Zmittag, Filetbrate mit Härdöpfusalat, hani dänkt, mir probiere doch das mit däm Föteli umdssetze. Schwups bini bim Peter gsi u ha ne gfragt, ob är und dr Herr Bundesrat bereit wäre, mit üs äs Gruppeföteli ds mache. Ke Frag, sicher si mer bereit! Ig ha üsi Gruppe greicht u mir hei nis bir Stoss Kappälle besammet für nes Föteli. Das isch es wäuts Erläbnis gsi! Het doch vorhär no niemer vo üs miteme Bundesrat gred. U dr Herr Maurer het sech für jede vo üs Zyt gno u paar Wort mit nis gwächslet.

Us reinem Gwunder hei mer dänkt, mir losi u luegi mau was ä Schützelandsgemeind sigi. Guet, bim lose u luege isch es nid ganz blibe, hei si doch öpper vo üs aus Stimmezählere gwähut.

Mir si beidrukt gsi: 16 Trakdande i 66min! Das isch rassig gange.

Wo die düre isch gsi, hei mer nis ufe Heiwäg gmacht. Wo mer ghört hei, das es stouet uf dr Outobahn, heimer dr Wäg über Land gno. Ig ha gar nid gwüsst, das es no meh so schöni Gägende u Orte git ir Schwiz. O bim Heifahre isch es eher ruhiger gsi im Outo. Nume ab und zue äs schüchs schnarchle het me vernoh. Mir hei no ä Zimishaut igleit für üsi Mäglis chli ds füue u ds beruhige.

Öppe am 8i si mer wider am Usgangspunkt vo üsere Tagesreis gsi. Äs isch ä wäuts schöne Dag gsi! Mir hei ä hufe nöii Lüt, äs nöis Schiesse u nöii Gägende dörfe lehre kenne!

Es het mega spass gmacht mit öich aune dert häre dörfe ds ga!

Danke dass dr sit mit cho: Andrea, Poof, Pädu, Phippu, Flöru, Lüku u Weggu! Ig has Sehr gnosse mit öich! D Tätschmeischtere Fränzi.